

Year of
Consecrated Life



PATNUBAY SA MISA



4 Oktubre 2015

Ika-27 Linggo sa Karaniwang Panahon

Taong B

ANG DUYAN NG BUHAY AT PAGMAMAHAL

Ipinaaalaala sa atin ng mga pagbasang panliturhiya na ang pamilya ay siyang una't batayang institusyon ng lipunan. Ang kalikasan at layunin nito ay nakaukit sa kabuuan ng lalaki at babaeng di-ganap sa ganang sarili lamang. Kaya nga, kailangan nila ang tulong ng kanilang "kabiyak" upang matamo ang kanilang ganap na potensiyal at tugunan ang kanilang emosyunal at pisikal na pangangailangan.

Kaya nga lamang, naipunla na ng kasalanan sa maraming pamilya ang mga binhi ng kasakiman at pagtataksil na nauuwi sa mga napakasakit na paghihiwalay. Si Hesus, na naparito upang ibalik ang lahat ng aspeto ng ating buhay sa kanilang orihinal na karangalan, ay nagpapaalaala sa atin sa plano ng Diyos para sa pamilyang pantao, at ginaganyak niya ang lahat para panatilihin ang dating plano ng Diyos para rito. Kaya nga, ipagdasal natin ang lahat ng pamilya.



PASIMULA



Pambungad

(Ipahahayag lamang kung walang awiting nakahanda.)

Dahil sa 'yong kalooban na hindi malalaban, sanlibuta'y umiral. Langit, lupa'y 'yong kinapal. Diyos ka ng sanlibutan.

Pagbati

P –Pagpalain ang Diyos na lumikha sa pamilya upang maging salamin ng Kanyang pagmamahal na "Trinitarian." Ang Kanyang biyaya at kapayapaan ay sumainyong lahat.

B –At sumaiyo rin!

Pagsisisi

P –Sa paghahanda natin para sa paghahandog ng Banal na Eukaristiya, alalahanin natin ang ating mga kasalanan, lalo na ang mga kasalananang laban sa karangalan at kabanalan ng ating pamilya. (Manahimik saglit.)

P –Para sa mga pagkakataong nakalimot kaming Ikaw ang

Dakilang Lumikha sa pamilyang pantao, Panginoon, kaawaan mo kami!

B –Panginoon, kaawaan mo kami!

P –Para sa mga pagkakataong ipinagpalagay namin ang aming mga kapamilya at nakasakit kami ng kanilang damdamin, Kristo, kaawaan mo kami!

B –Kristo, kaawaan mo kami!

P –Para sa mga pagkakataong naging dahilan kami ng mga pagkakahati-hati, selos, at hinanakit sa aming mga pamilya, Panginoon, kaawaan mo kami!

B –Panginoon, kaawaan mo kami!

P –Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B –Amen!

Papuri

B –Papuri sa Diyos sa kaitaasan at sa lupa'y kapayapaan sa mga taong kinalulugdan niya. Pinupuri ka namin, dinaranggal ka namin,

sinasamba ka namin, ipinagbunyi ka namin, pinasasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalangin Pambungad

P –Ama naming makapangyarihan, ang iyong dakilang pagkamaawain ay nangingibabaw sa aming ginagawang kabutihan at idina-daing na mga kahilingan. Ang kagandahang-loob mo sa amin ay gawin mong mag-umapaw upang

ang kasalanang ipinangangam-
bang ihingi ng kapatawaran ng
budhi naming takot na ikaw ay
lapitan ay iyong patawarin nang
lubusan at ang ipinag-aalangan
naming hilingin sa pagdarasal
ay iyong pagbigyang aming
makamtan sa pamamagitan ni
Hesukristo kasama ng Espiritu
Santo magpasawalang hanggan.
B – Amen!

PAGPAPAHAYAG NG SALITA NG DIYOS



Unang Pagbasa *Gen 2:18-24*
*Inilalahad ng aklat ng Ge-
nesis ang pinagmulan ng pamily-
ang pantao bilang bahagi ng
plano ng Dakilang Lumikha. Ang
kalikasang sosyal at pantay na
karangalan ng lalaki at babae
ang matibay na pundasyon ng
isang maligayang pamilya at ng
isang tapat na lipunan.*

L – Pagpapahayag mula sa Aklat
ng Genesis

Sinabi ng Panginoong Diyos:
“Hindi mainam na mag-isa ang tao;
bibigyan ko siya ng makakasama
at makakatulong.” Kaya, lumikha
siya ng mga hayop sa parang at
ibon sa himpapawid, inilapit sa tao,
at ipinaubaya rito ang pagbibigay
ng pangalan sa mga iyon. Kung
ano ang kanyang itawag, iyon ang
magiging pangalan nila. Ang tao nga
ang nagbigay ng pangalan sa lahat
ng ibon at mga hayop, maging ma-
amo o mailap. Ngunit wala isa man
sa mga ito ang angkop na kasama
at katulong niya.

Kaya’t pinatulog ng Panginoon
ang tao. Samantalang nahihimling,
kinuha niya ang isang tadyang nito
at pinaghilom ang laman sa tapat
niyon. Ang tadyang na iyo’y ginawa
niyang isang babae, at inilapit sa
lalaki. Sinabi ng lalaki, “Sa wakas,
narito ang isang tulad ko, laman ng
aking laman, buto ng aking buto;
babae ang siyang itatawag sa kanya
sapagkat sa lalaki nagmula siya.”

Itong dahilanan kaya iniwan ng
lalaki ang kanyang ama at ina upang
sumama sa kanyang asawa, sapagkat
sila’y nagiging iisa.

Ang Salita ng Diyos!

B – Salamat sa Diyos!

Salmong Tugunan *Awit 127*

B – *Tayo nawa ay basbasan ng
Poon magpakailanman!*

R. M. Velez



Ta-yo nawa ay basbasan ng Po-



on magpa-kailan-man!

* **Mapalad ang bawat tao na sa**
Diyos ay may takot, ang maalab na
adhika’y sumunod sa kanyang utos.
Hindi siya magkukulang sa anumang
kailangan, ang buhay ay maligaya’t
uunlad ang kanyang buhay. **B.**

* **Sa tahanan, ang asawa’y parang**
ubas na mabunga. Bagong tanim
na olibo sa may dulang ang anak
n’ya. **B.**

* **Ang sinuman kung ang Diyos**
buong pusong susundin, buhay
niya ay uunlad at laging pagpa-
palain. Mula sa Sion, pagpapala
nawa ng Diyos ay tanggapin, at
makita habang buhay, pag-uunlad
ng Jerusalem. **B.**

* **Ang magiging iyong apo, nawa**
ikaw ay abutin, nawa’y maging
mapayapa itong bayan ng Israel! **B.**

Ikalawang Pagbasa *Heb 2:9-11*
*Ipinaaalala sa atin ng may-
akda ng liham sa mga Hebreo*
ang di maiwasang bunga ng
Pagkakatawang-tao ng Anak ng
Diyos: ang kanyang pagkaka-
hantad sa pagdurusa at kamata-
yan. Sa pamamagitan nito niya
naipakita ang kanyang pakikiisa
sa lahat ng tao at natamo ang
kanilang kaligtasan.

L – Pagpapahayag mula sa Sulat
sa mga Hebreo

Mga kapatid, alam nating si He-
sus, bagamat sandaling panahong
pinababa kaysa mga anghel, ay
binigyan ng karangalan at kadaki-
laan dahil sa kanyang pagkamatay.
Dahil sa pag-ibig ng Diyos, niloob
niya na si Hesus ay mamatay para
sa ating lahat. Sa pamamagitan ng
mga pagtitiis, siya’y pinapaging-
ganap ng Diyos na lumikha at
nangangalaga sa lahat ng bagay,
upang makapagdala ng marami sa
kaluwalhatian. Marapat lamang na
gawin niya iyon sapagkat si Hesus
ang pinagmumulan ng kanilang
kaligtasan.

Si Hesus ang nagpapabanal sa
kanila, at iisa ang Ama ng nagpa-
pabanal at ng pinapaging banal.

Kaya’t hindi niya ikinahiyang tawagin
silang mga kapatid.

Ang Salita ng Diyos!
B – Salamat sa Diyos!

Aleluya *1 Jn 4:12*

B – Aleluya! Aleluya!
Sa pagmamahalan natin ang
D’yos ay ating kapiling, pag-
ibig n’ya’y lulubusin.
Aleluya! Aleluya!

Mabuting Balita *Mc 10:2-16*

Ang pagpapahintulot ni
Moises sa paghiwalay sa
asawa ay tanda ng mga bunga
ng pagkamakasalanan ng tao
maging sa napakarelihiyoso
mang lipunan. Misyong ni Hesus
na ibalik ang pamilya sa dati
nitong karangalan, kaisahan,
at katatagan.

P – Ang Mabuting Balita ng
Panginoon ayon kay San
Marcos

B – Papuri sa iyo, Panginoon!

Noong panahong iyon, may mga
Pariseong lumapit kay Hesus. Ibig
nilang masilo siya kaya’t kanilang
tinanong, “Naaayon ba sa Kautusan
na hiwalayan ng lalaki ang kanyang
asawa?” Tugon niya, “Ano ang utos
sa inyo ni Moises?” Sumagot naman
sila, “Ipinahintulot ni Moises na
hiwalayan ng lalaki ang kanyang
asawa matapos bigyan ng kasulatan
sa paghihiwalay.” Ngunit sinabi ni
Hesus, “Dahil sa katigasan ng inyong
ulo kaya niya inilagda ang utos na ito.
Subalit sa pasimula pa, nang likhain
ng Diyos ang sanlibutan: ‘Nilalang
niya silang lalaki at babae. Dahil
dito’y iwan ng lalaki ang kanyang
ama at ina, at magsasama sila ng
kanyang asawa, at sila’y magiging
isa.’ Kaya’t hindi na sila dalawa kundi
isa. Ang pinagsama ng Diyos ay
huwag paghiwalayin ng tao.”

Pagdating sa bahay, ang mga
alagad naman ang nagtanong kay
Hesus tungkol sa bagay na ito. Sinabi
niya sa kanila, “Ang sinumang lala-
king humiwalay sa kanyang asawa at
mag-asawa sa iba ay gumagawa ng
masama sa kanyang asawa – siya’y
nangangalunya. At ang babaing
humiwalay sa kanyang asawa at mag-
asawa sa iba ay nangangalunya rin.”

May nagdala ng mga bata kay
Hesus upang hilinging ipatong niya sa
mga ito ang kanyang kamay; ngunit
pinagwikaan sila ng mga alagad.
Nagalit si Hesus nang makita ito, at
sinabi sa kanila, “Pabayaang ninyong
lumapit sa akin ang mga bata, huwag

ninyo silang sawayin, sapagkat sa mga katulad nila naghahari ang Diyos. Ito ang tandaan ninyo: ang sinumang hindi tumatanggap sa paghahari ng Diyos tulad ng isang maliit na bata ay hindi mapapabilang sa mga pinaghaharian niya.” At kinalong ni Hesus ang mga bata, ipinatong ang kanyang mga kamay sa kanila at pinagpala sila.

Ang Mabuting Balita ng Panginoon!

B – Pinupuri ka namin, Panginoong Hesukristo!

Homiliya

Sumasampalataya

B–Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P–Nakatulung sa atin ang mga pagbasa ngayon para mapahalagahan natin ang kabanalan ng kasal at mahalaga nitong papel sa plano ng Diyos. Manalangin tayo ngayon para sa lahat ng pamilya sa daigdig:

B–Nagtatag sa pamilya ng tao, dinggin Mo kami!

* Nawa ang Katolikong Simbahan, sa pamumuno ng Santo Papa at mga Obispo, ay matagumpay na makapagtaguyod sa kaisahan at katatagan ng mga pamilya. Manalangin tayo! **B.**

* Nawa pahalagahan ng lahat ng Katoliko ang kabanalan ng kasal at ipagtanggol ito laban sa lahat ng pagbatikos at pagbabago. Manalangin tayo! **B.**

* Nawa ang mga pamilyang dumaranas ng krisis sa relasyon ng mag-asawa ay makatagpo ng lakas para mapagtagumpayan ang mga problema sa pamamagitan ng dasal at malasakit sa kanilang mga anak. Manalangin tayo! **B.**

* Nawa pahalagahan ng lahat ng guro ang bokasyon nilang kaloob ng Diyos at matatag silang magturo nang may pagmamahal. Manalangin tayo! **B.**

* Nawa ang pagdiriwang ng “Taon ng mga Dukha” ay maging buto ng pagbabago ng mga pamilya, ng buong Simbahan, at ng bansa, at maging udyok para tayo’y tumulong sa ating kapwa, lalo na sa mahihirap. Manalangin tayo! **B.**

* Nawa maisabuhay natin ang ating pinaniniwalaan bilang mga Kristiyano at maisaayos ang ating buhay ayon sa mga katotohanan ng ating pananampalataya. Manalangin tayo! **B.**

* Tahimik nating ipanalangin ang ating mga pansariling kahilingan. (*Tumigil saglit.*) Manalangin tayo! **B.**

P–Panginoong Diyos, sa Iyong plano para sa sangkatauhan, ibig Mong bawat pamilya ay maging isang sakramento ng Iyong mabungang pagmamahal. Pagkalooban Mo ang lahat ng pamilya, at lalo na ang mga pamilya ng ating parokya, ng kasaganaan ng Iyong biyaya at kasiyahan ng Iyong presensiya. Isinasamo namin ito sa pamamagitan ni Kristong aming Panginoon. **B –Amen!**

B –Amen!



P–Manalangin kayo . . .

B–Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P –Ama naming Lumikha, tanggapin mo ang paghahain ng mga alay na iyong inihabilin at sa pagdiriwang ng dapat naming ganapin ang kabanalan ng iyong pagliligtas nawa’y sumaaamin sa pamamagitan ni Hesukristo kasama ng Espiritu Santo magpasawalang hanggan. **B– Amen!**

Prepasyo ng Pag-iisang Dibdib (III)

P –Ama naming makapangyarihan, tunay ngang marapat na ikaw ay aming pasalamat.

Sa paglikha mo sa tao bilang iyong kawangis, ang iyong kadakilaan ay iyong ipinamana upang mailahad ang iyong dakilang pag-ibig sa tapat na pagsasama ng mga mag-asawa. Hindi ba’t iyong pag-ibig ang sanhi ng paglikha sa tao? Kaya’t pag-ibig mo pa rin ang mamahalin ng mga tapat sa iyo. Ang pag-iisang dibdib ng mga magsing-ibig ay siyang banal na tagapahiwatig ng iyong maaasahang pagtatangkilik kaya’t sa pag-ibig mo sumasanib ang pag-ibig ng mag-asawa sa pamamagitan ng aming Panginoong Hesukristo.

Kaya kaisa ng mga anghel na nagsisiawit ng papuri sa iyo nang walang humpay sa kalangitan kami’y nagbununi sa iyong kadakilaan:

B – Santo, santo, santo Panginoong Diyos ng mga hukbo. Napupuno ang langit at lupa ng kadakilaan mo. Osana sa kaitaan!

Pinagpala ang naparirito sa ngalan ng Panginoon. Osana sa kaitaan!

Pagbubunyi

B– Aming ipinahahayag na namatay ang ‘yong Anak, nabuhay bilang Mesiya at magbabalik sa wakas para mahayag sa lahat.



B– Ama namin . . .

P– Hinihiling namin . . .

B– Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B– Kordero ng Diyos na nag-aalis ng mga kasalanan ng sanlibutan, maawa ka sa amin. (2x)

Kordero ng Diyos na nag-aalis ng mga kasalanan ng sanlibutan, ipagkaloob mo sa amin ang kapayapaan.

Paanyaya sa Pakikinabang

P– Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging. **B**– Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinabang

(Ipahahayag lamang kung walang awiting nakahanda.)

Ang Panginoon’y dakila sa kabutihan n’yang kusa para sa nagtitiwala sa kanyang habag at awa na kanyang dulot sa madla.

Panalangin Pagkapakinabang

P –Ama naming mapagmahal, ipagkaloob mong sa pagsasalo namin sa pagkai’t inuming banal kami ay maging Katawan ni Kristo na aming pinakinabangan sa pamamagitan niya kasama ng Espiritu Santo magpasawalang hangan.

B –Amen!

PAGWAWAKAS



P –Sumainyo ang Panginoon.

B –At sumaiyo rin!

P –Pagpalain kayo ng makapangyarihang Diyos: Ama, Anak, at Espiritu Santo.

B –At sumaiyo rin!

P –Humayo kayo sa kapayapaan upang mahalín at paglingkuran ang Panginoon.

B –Salamat sa Diyos!



HUWAG PAGHIWALAYIN ANG PINAGSAMA NG DIYOS!

Ang lalaki at babae ay hindi inilaang mabuhay na mag-isa. (*Sangguniin Gen 2:18.*) Bilang mga nilalang na panlipunan, sila’y para sa pamumuhay panlipunan, pakikipagtalastasan, pakikipagkaibigan, at pakikiisa. Bilang mga nilalang na seksuwal, magkapunuan ang lalaki at babae at nakalaan para magparami sa patuloy na pagpapalago sa sangkatauhan.

Sa plano ng Diyos, ang kasal ay siyang matibay na tipan ng pagmamahalan kung saan tinutugunan ng isang lalaki at isang babae ang kani-kanyang sosyal, emosyunal, at seksuwal na pangangailangan. Ito ang pundasyon ng pamilya, ang pangunahing anyo ng lipunan. Bawat pamilya ay dapat na maging larawan ng malikhain at masu-yong pagtingin ng Diyos.

Gayunman, **ang kasal at ang pamilya, tulad ng iba pang katunayan, ay nagtataglay rin ng bunga ng kasalananang orihinal at ng pagkakasalang panlahat.** Pilit na sinisira ng kasalanan ang pinag-isa ng plano ng Diyos. Lahat ng pagkagawi ng ating kalikasang pantao – panibugho, sensuwalidad, pagtataksil, pagka-makasarihi’t kasakiman, . . . kasama pa ng masamang halimbawa ng kapaligiran, ay patuloy na nagbabantang

manira sa kaayusan at katahimikan ng mahuhusay mang pamilya.

Sa harap ng gayong mga karahasan, **dapat alalahaning lagi ng mga Kristiyanong mag-asawa ang biyaya ng sakramentong nagbuklod sa kanila sa isa’t isa kung paanong si Kristo at ang kanyang Simbahan ay pinagbuklod.** Ang gayong biyaya ay dapat pasiglahin sa pamamagitan ng pananampalataya, dasal, at katapatan sa mga pangakong sinumpaang. Ang mga tungkuling magmahalan nang tapat, pagtanggap at pagtulong sa isa’t isa, pagpapatawaran . . . ay dapat na tupdin nang bukas-palad.

Bawat pamilya ay dapat na sama-samang dumulog sa Diyos at manalangin. Anuman ang nangyari sa araw na sinundan, bawat buwang-liwayway ay dapat namang magdulot ng “kabaguhang” nakapaghihilom sa mga sugat ng nakaraan at umaabot nang lampas sa mga kasalukuyang ulap at bagyo.

At . . . bawat pamilya ay magiging isa ngang tunay na “munting Simbahan,” magandang lugar at inspirasyon para sundan ng iba. Ang patunay na maidudulot ng isang tunay na Kristiyanong pamilya ay isa sa pinakamahusay na handog sa Simbahan at sa lipunang panlahat.



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

• E-mail: marketing@wordandlife.org, wordandlifepublications@gmail.com • FB: Word & Life Publications

• Editorial Team: Fr. S. Putzu, C. Valmonte, Sr. F. Santos, SMI, G. Ramos, R. Molomog, D. Daguio,

V. David • Illustrations: A. Sarmiento, B. Cleofe • Circulation: F. Edjan